

Powšitkowne WOZJEWJENJA

njedźelu, 17. awgusta 2014

Zelowy swjedzeń w Klóštrje

W klóšterskej zahrodže w Pančicach-Kukowje je tutu njedźelu, 17. awgusta, tradicionelny zelowy swjedzeń. Ekumeniski nyšpor w 14.30 hodź, na kotrymž so zelowe kwěćele požohnuja, změjetaj Njebjelčanski farar Beno Jakubaš a farar Tobias Weisflog z Kinsporka. Rjadniske sotry Božu službu sobu wuhotuja. Jej přizamknje so koncert dujerskeje kapały „Horjany“. Tež zelowe wiki so w běhu popołdnja přewjedu.

Wodženje po wustajeńcy wo Kurće Hajnje

We wobłuku wosebiteje wustajeńcy wo Kurće Hajnje jako wobrazowym chronisce 20. lětstotka wotměje so w Budyskim Serbskim muzeju tutu njedźelu, 17. awgusta, w 15.00 hodź. zjawne wodženje z awtorom wustajeńcy Jürgenom Maćijom. Zajimcam předstaji so měnate žiwjenje a njesprócnawe fotodokumentariske skutkowanje Kurta Hajny. Wón zapopadowaše momenty wšédneho dnja, wobswětlowaše kulturny rozmach Serbow w powójnskim času a dokumentowaše towaršnostne změny we Łužicy.

Boža mša w serbskej rěči w Drježdźanach

Serbja z Drježdźan a wokoliny, jich přiwuzni a přećeljo su přeprošeni na Božu mšu z fararjom Gabrišom Nawku njedźelu, 31. awgusta, we 18 hodź. do cyrkwy swjateho Antonija w Drježdźanach-Löbtauwje, Bünauska 10. Po kemšach zetkamy so k serbskej bjesadze. *Marjana Bubnerjec*

Putnikowanje z kolesom

Dom biskopa Bena w Smochćicach zarjadowuje wot njedźele do njedźele, 14. do 21. septembra, putnikowanje z kolesom po Hornjej Łužicy. Wšědnje pojedu něhdže 40 do 50 kilometrow. Čary powjedu putnikow ze Smochćic do wšelakich směrow, na přikład do hole abo do łužiskich hór. Po puću budu čitanja, zamyslenja abo rozmołwy. Zajimcy njech přizjewja so w Smochćicach, telefonowe čisło (03 59 35) 2 23 15. Tam dóstanu tež nadrobniše informacije.

Mandźelski seminar

Přichodny lětuši termin mandźelskeho seminara je pjatk a sobota, 28./29. nowembra, w Smochćicach. Přizjewić měli so zajimcy pisomnje pola Dekanatneho dušepastyrstwa, Młynski puć 4, we 01920 Worklecach.